

吹

景

集

吹景集卷之二

烏程

董斯張遐周著

韓昌箕仲弓訂

辨鍾元常甲戌帖

吾粵徐生示余東武亭侯帖云易之閩郭聖僕字畫似不類宣示諸帖淳化大觀而下都所未收其文曰大魏黃初元年十二月甲戌大理東武亭侯臣鍾繇上坐調元化曾何力枝葉滋茂本根實時數大亨豈一具述今江南草間奚足以辱王師乎侯其苛慘因

民不忍便以伐罪可也且中國之師豈與島夷爭一  
旦復虧威信誠恐不足伏服南夏也臣兼行履險蹈  
夷臣以無任不獲之命旣已臣服繇言戎路扈從徐  
極有德色余按此帖載劉次莊戲魚堂帖中但下語  
都無漢末風氣又表中那得稱大魏耶如秀州項子  
京所藏王方慶進寶章帖亦止云萬歲通天二年初  
不書僞周國號准此便可了至南夏二字尤足噴飯  
以夷易夏三尺童子亦能辨此餘兼行扈從等語大  
率生燂戎路其中旣云蹈夷何稱履險真是以子之

矛刺子之盾何物陋人自納敗闕至此遠出曹曹參  
軍七賢帖下矣徐唯唯

夢中句

僕癸丑春夢中得句云石鏡逢秦女山精照落花政  
使醒時爲之未必奇險乃爾客戲曰而今當行詞彥  
只須辦半歲草鞋錢向關中行脚去僕詰之則曰意  
欲登蓮華峰頂等希夷老人睡寤時乞取一千首華  
山詩耳

再辨元常帖

前辨甲戌帖定爲贗鼎周虞卿謬以爲書家申韓第  
一時證據尚未詳案崔汜亂平繇始封侍中僕射東  
武亭侯魏國初建爲大理遷相國建安二十四年九  
月坐西曹掾魏諷反免丕卽王位復爲大理及篡竊  
繇以佐命功改廷尉進爵崇高鄉侯矣何得復列故  
衞耶又是年七月江東遣使通好子桓代漢以十一  
月易延康爲黃初元年大寶初據草昧未寧無暇復  
籌外事長江天限語後此數年帖中乃云戎路扈從  
此茫然何所指卽戎路冒寒一帖運筆險絕文亦爾

雅諸名家都寶異之其間猶有可疑者壯繆嬰禍建安二十五年正月孫氏始來告表云建安二十四年閏月九日捷書未至何能豫聞耶其書爵則亭侯之上系以南蕃亦似無據因此旁證自右軍所臨宣示墓田外卽閣帖蒐訪強半好事爲之如蕭誠白麟輩耳繇爵終於太傅定陵侯袁千里評書中稱司徒何耶虞卿曰今日可謂問一得三千年疑城盡情洗却豈獨鍾氏功臣省誤却後來好男女手眼學書人故不可不讀史也歐公集古錄中戎路帖亦有辨司徒

者太傅子士季也見卮言附錄

黃長睿辨戎路非虜書至天刃二字強爲之釋云其  
曰天刃者謂關爲徐晃所破雖未卽殺之而關已被  
創矣至十二月權始追獲之蓋晃之破關在閏十月  
權殺關在十二月今繇以閏月上操表乃賀是月之  
破關非賀十二月之破關也信黃語則表所云傳方  
反覆不終厥命者又何以稱耶且云南蕃之蕃音皮  
謂南蕃郡也東武南蕃屬故并著然則鄉公亭侯但  
書郡名足矣不必更列本銜無乃爲主爵者所紕耶

按南皮卽曹子桓與吳季重輩遊讌處水經注清河  
又東北逕南皮縣故城漢建安中魏武擒袁譚於此  
則子桓所云南皮之遊當在從軍時也兩漢書渤海  
郡有南皮縣關駟曰章武有北皮亭故此云南未聞  
爲南蕃郡也獨魯國蕃縣之蕃應劭曰邾國也音皮  
亦未聞其爲郡也黃蓋悞憶章武之爲東武故遂作  
此妄語耳

董道亦以賀表非元常書

武媚孃書



武媚孃精心白業文瀾斐亶御製華嚴序迴文記外  
又撰昇中述志碑相王旦正書撰述聖紀中宗書撰  
昇仙太子碑后自書見趙明誠金石錄昇中碑宋政  
和中詔河南尹碎之述聖及昇仙二碑余不及見近  
得洛中所搨幸少林寺詩及奉某禪師書又贈王法  
主誥載茅山志詩載唐詩紀今錄其書誥於左

暑侯將闌炎序彌縟山林靜寂梵宇清虛宴坐經行  
想當休愈弟子前隨鳳駕過謁鷲巖觀寶增以徘徊  
覩先妃之淨業薰修之所猶未畢功一見悲驚萬感

兼集攀光寶樹載深風樹之哀弔影珠泉更積寒泉  
之思弟子自惟薄佑鎮切煢懷每屆秋期倍軫摧心  
之痛炎涼遞運逾添切骨之哀未極三旬頻鍾二忌  
恨乘時而更恨悲踐露而逾悲唯托福田少申荒思  
今欲續成先志重置莊嚴故遣三思賁金絹等物往  
彼就師平章幸識斯意卽務修營望及諱辰終此功  
德所冀罄斯誠懇以奉津梁稍宣資助之懷微慰煢  
迷之緒畧書示意指不多云

門下子喬羽化或畱連於故祠康成道存尚延佇於

舊邑矧夫跡膺仙籙名偶正朝追想遺塵載殷遠念  
故玉清觀道士贈太中大夫并真先生王遠知性與  
道合神從化游初窮帝解之微自得天倪之理時歷  
三代韞秘術以韶光年踰十紀屬睿圖之啟運藏往  
知來察幽鑒遠函符先渥緬惟贈恤之恩聿申後命  
宜峻褒崇之禮可贈金紫光祿大夫昇玄先生餘如  
故主者施行嗣聖元年正月二十八日

丙辰詩

丙辰南省榜出吳中有詩云咲破長安第一花東風

玉筍蚤摧芽人前不舞渾如鶴文苑餘分恰似蠅莫  
以之無求筦庫從來杖杜合宣麻秦關何處通消息  
八月江南雁字斜

阮步兵

阮步兵二十年不減否人物時人謂之至慎當年廣  
武一歎卽卯金三傑猶云豎子成名魏晉一流人直  
是無此老置口處若云典午代興忘言逸禍只一鄉  
愿伎倆耳獨胸中磊塊四字大爲白眼傳神

始祖仁壽公石船

始祖仁壽公自梅林遷潯上里中呼爲三老董公勝國之季行中書省三辟之公歎曰龍不隱鱗達者深痛吾婚嫁幸了絳影人間復能持手板看他人鼻息乎竟不應遂鑿石爲船以見志曰此船可爛吾其出矣性喜吟咏曾和中峰梅花詩百首嘉靖中惜毀于火吾宗猶有見之者云風氣絕似鐵笛老仙

### 六朝鏡銘

余購得一鏡縱橫俱三寸餘色淳黑如漆鈕亦不甚濶背作忘憂花葉四旁古錦文中有銘三十二字銘

曰煉形神冶瑩質良工如珠出匣似月停空當眉寫  
翠對臉傳紅綺窻繡幌俱含影中形神兩字半爲土  
蝕結字極奇古韻藉微帶八分對字臉字創體尤詭  
語亦娟娟深秀的爲徐庾手筆非唐諸家所逮魏晉  
碑板灰冷烟飛寒山片石空聞其語卽今六代風流  
不盡如王謝堂前燕者賴此一照子猶可想像百分  
一耳

此銘載蜀藝文志傳爲孟蜀時物恐未爾字畫絕  
不類唐以後習氣那可以耳爲眼耶弇州云似隋

煬帝語此老故具眼然王先生猶未見字畫也考  
博古圖以爲唐瑩質鑑圖中載二器其一較余所  
藏銘多八字亦有小異末云光含晉殿影照秦宮  
鐫書玉篆鏤影清銅晉殿清銅語殊可咲其一銘  
亦三十二字但末句云綺窻繡幄俱照秦宮視俱  
含影中語霄壤矣余所藏確爲六朝物宣和二器  
當是唐人依倣六朝爲之者

學齋佔俾載遜跡山  
郭家崖石臺鏡銘與

此正合且云取鏡有風  
雨聲其神異抑寓言耶

閔子京曰張君房麗情集蜀王宗衍幸鳳州天維

軍節度使王承休妻嚴氏有美色衍愛幸之賜以  
妝鏡其銘云云遐周所藏鏡銘亦爾豈嚴媛奩中  
物因蜀亡兵燹塵埋郭家塋幾八十年至景德中  
始皇皓影今遂歸董郎玉臺耶芳魂在鏡當呼之  
爲董郎捧硯

唐世科目

偶讀高似孫緯略載唐世科目張文成樊宗師文士  
也文成第才膺管樂科宗師第材任將帥科常執誼  
王播皇甫鏞李宗閔姦人巨擘也而皆第賢良方正



科顏清臣勁節可師百世僅入文詞秀逸之目惟張  
曲江神龍二年第材堪經邦科先天元年再第道侔  
伊呂科似主司差有眼孔耳至乾封二年立幽素科  
建中元年立高蹈丘園科尤可笑一第何足重人古  
今之通論也李贊皇曰好驢馬不入隊行誠然

贊皇亦是自歎之詞羅隱云我脚夾筆可敵數輩

同此意

閔康侯

馬守愚拆字

神廟初馬守愚來里中不知何許人工謝石之術多

奇中有爲人作蹇修者以吉帖二字問馬曰此姻事  
已諧以帖字巾俯橫吉下喜象也然諧後且有憂吉  
下口置巾上宛然一吊字也後果然卜者沈某以金  
字問馬曰君其五行中安身立命乎恨與小人作緣  
三十年後以此敗亦以此獲後沈以後妻故有雀鼠  
之訟乃其婦頗健持門戶卒藉溫飽憶拆字時年恰  
三十一里父之子商于楚數稔不歸馬適在東藏寺  
里父拽杖之寺訪馬求卜適覲面以杖倚米箱揖之  
馬問云何具以對馬曰汝子已抵家汝可速去米貫

一木非來而何里父歸其子前候門矣有江寧生者  
客潯聞其異往看不告姓名值案頭積書指波濤二  
字曰君能爲一測否馬諦視久忽詫曰君佳士何落  
節到此夫水易爲坎輓爲濶下陷不出下不返淫汗  
漂溺都從此生君無還年矣非噬非剝膚淪於澤是  
維女子媾男爲慝夫不祥其孰章氓之馮戎壽爲大  
期著田成疇著金成鑄著人成儔今也不然井田爲  
川鑄非其器無人儔之蕩蕩汨汨靡所止期循聲曰  
逃巫臣竊妻子意者其似之生傲然曰君亦知僕何

姓乎馬曰象畫旣昭群鬼夜囂吹律知姓萬物同憂  
沔焉水區壽誰其餘按象而談君非蔡仲之裔乎江  
寧生廼前謝曰神哉先生僕少失父兄好爲治遊畢  
燼其宮携歡而東我雲彼龍先生愍斯維曷塗之從  
馬曰夫疑慮者不可惑以貌知方者不可淆以蹈玄  
冥失馭后土其奠之愆之坤鄉無與巽謀三壽作朋  
西南得之擇里而安安錢唐其可遷乎其摘隱躡秘  
皆此類也某先生致事歸且浹歲呼馬詣第拈一休  
字訊焉馬取所書字承日影覆背凝睇忽曰異哉一

轉便成兵字夏官乏員微公其誰某咲曰吾長安塵  
土久無入夢生勿言居無何朝鮮事起某以邊材論  
薦趣攝少司馬篆云聞長老言馬來吾里時恒寂  
居隣寺匡坐窮日無妄咲所獲錢亦隨手散去乞者  
便與之類古稱隱行君子哉竟來去不自道鄉里卒  
無有傳其伎者遐周曰若以六書求馬馬所測殊有  
乖舛處然此自卜筮事不詹詹執許慎徐鉉之學苛  
尋其短也令許徐輩測之豈能奇中如馬耶

道書云  
丹經萬

卷不如守一愚  
馬取義本此

軋軋當作乙乙

宋本昭明選文賦云思乙乙其若抽說文解乙字云象春艸木寃曲而出陰氣尚彊其出乙乙也又尤字解云尤異也從乙又聲乙欲出而見闕則顯其尤異也又解叟字云從臼從乙乙屈也淮南子太甲在甲曰闕逢注萬物擁遏未通也在乙曰旃蒙注萬物遏蒙甲而出也司馬遷律書云乙者萬物生軋軋也漢書律歷志奮軋於乙穀梁傳軋辭范甯注軋委曲也劉熙釋名云乙軋也自相軋而出也則軋者乙之詁

也梁江革嘲何記室聯句不成云疇昔故翩翩今辰  
何乙乙元結補樂歌序乙乙冥冥有純古之聲雲間  
之藍本乎松雪行楷作軋軋字殊誤又受蚩拙目之  
蚩宋本作吹世間墳籍改金根車者故不乏深可歎  
或云許說太僻仲春桃已華何言冤曲耶案月令季  
春句者畢出萌者畢達則此前猶未盡出未盡達也  
益信許說之妙

古詩多譌字

唐人上元詩坊本俱云金吾不禁夜藝文引此詩禁

字乃惜字耳又虞姬歌四面楚歌聲初疑先秦那得有唐人詩比讀楚漢春秋云四方楚歌聲太白烏棲曲銀箭金壺漏水多孟啟本事詩作金壺丁丁漏水盡殊妙又烏夜啼結二句本事詩作停梭向人問故夫欲說遼西淚如雨便覺獨宿空房大是俗境但烏啼曲一句用一韻古體相沿如此漏水盡一句獨無韻似非格此盡字確爲溢字傳寫亥豕耳江采蘋詩長門盡日無梳洗何必珍珠慰寂寥八閩通志載此詩慰字作與字蓋言履綦無聲明璫盈握翻使蕭閒



之情轉深猶持愁以相贈也視俗本慰字何啻嚼蠟  
劉禹錫詩高髻雲鬟宮樣妝高髻四字本事詩作髮  
髻梳頭升菴集作浮渲梳頭又斷盡蘇州刺史腸蘇州二字本  
事詩作江南只數字便有雅俗之異崔護詩人面不  
知何處去夢溪筆談作人面祇今何處是亦勝定知  
古詩中譌字不少證文字通者其辨之

楊夫人詩祖山谷

弇州藝苑卮言姝擊節楊夫人曰歸曰歸二語昨從  
張嗣宗借山谷外集看一聯云美人美人隔湘水其

雨其雨怨朝陽寄初和叔詩中句也弇州極詆宋詩  
乃埋名士而譽笄褊豈不令雙井失咲然其雨怨朝  
陽已入步兵之咏曰歸歸未克復徵大陸之唱美人  
秋水杜老遺音杜寄韓諫議詩美  
人娟娟隔湘水昔之人早以風雅  
爲我用矣

唐人用疊語如太白枯楊枯楊爾生稊又美人美人  
歸去來少陵長鑱長鑱白木柄長吉採玉採玉須水  
碧樂天劉郎劉郎莫先起蘇臺蘇臺隔煙水黃詩意  
祖之宋人用成語如誰其言者雨黃鵠何以報之雙

玉盤載困學紀聞亦可詠也獨謝康樂白岸亭詩交  
交止栩黃吻吻食萍鹿神奇巧妙居然千古之隻

浮筠亭

山谷爲洪駒父作晉州學浮筠亭銘曰豐肌秀骨先  
後輩出何其孺子也解祿樂群不舍晝夜何其學士  
也壯節臞躬而知歲寒何其丈夫也本管仲隰朋之  
對語語逼古但讚歎此君初不及玉一字按小戴禮  
孚尹旁達鄭玄注曰孚讀爲浮尹讀如竹箭之筠浮  
筠謂玉采色也采色旁達不有隱翳似信也孚或作

或爲扶正義曰尹依注作筍又作筠筴方附反升  
菴引此解云筴女膚也謂玉之滑澤如女膚緻密如  
筠膜也然則筠之爲言亦借用竹膜此二字只可言  
玉不可言竹也渠極稱精覈猶有漏處食筍詩誤云  
五溪無人採其一端耳歐公用事雖爛熟亦檢出處  
可作讀書十六觀補

按拾遺記云蓬萊有浮筠之簞葉青莖紫子大如  
珠有青鸞集其上依此則浮筠亦可名竹但山谷  
此語懸之學宮當取君子比德義不當從王嘉寧

誕說也又响父作叁堂諸名十有六皆取六經及

楊雄法言語

如駕說堂樂洋叁楷古叁之類

此浮筠二字不當舍

小戴而別有所徵決矣

生子之賞

豚兒之稱起阿瞞譏景升諸子乃春秋後語越王令  
國人生丈夫者賞以二壺酒一犬生女者壺酒一豚  
證此殊勝

隱公時雪

呂向雪賦注隱公時雪平地一尺是歲大熟深寧叟

駁之謂歲熟語無據按春秋考異郵云庚辰雪深七尺後周劉璠雪賦云庚辰有七尺之厚向陋生廼不知据此

又紀夢中句

癸亥長至第三日夢與孝若舅看月得句云便作一庭白虛堂分浩然甲子二月二日夢閱孫孟樸詩表有携妓入山寺詩僅憶二語云纖裾禮精舍殘日射人黃亦俊語也

閨房之秀

古來閨房之秀多以女丈夫呼之若目吾儕曰婦人  
便皇恐欲死真宇宙間大不平事靈山會上十大弟  
子成佛盡經多劫只一八歲女徑作南方調御師幾  
許鬚眉望猶海若今日若滿朝皆婦人何必減師濟  
之盛耶兵家者言靜如處女動如脫兔然則巾幗之  
遺諸葛公未必非牛耳宣王也

吹景集卷之三

烏程

董斯張遐周著

韓昌箕仲弓訂

南雲東雲西雲北雲

晏元獻公詞雁過南雲行人回淚眼庚溪引南雲北  
雁語誤以江總爲文通陸士龍贈鄭曼季詩聲播東  
汜響溢南雲又真誥東華靈妃歌云彈璫南雲扇香  
風鼓錦披江令詩亦其餘唾然不獨南雲可紀也阮  
嗣宗大人先生傳來東雲駕西風陶徵士答龐參軍



詩依依南楚邈邈西雲文通詩北雲竦征人讀書不  
半袁豹妄甲乙古人諺所云少所見多所怪見橐駝  
言馬腫背也余昔有西雲詩曰誰其俟公弋延領雷  
西雲但懷徑寸璜日與漁子羣客繆謂此語可陵江  
匹阮殊過情差或免杜撰耳

閔康侯引呂覽云雲  
氣西行水泉東流

### 春秋關華夷氣運

春秋一經游夏不能贊俗儒搏空鏤塵如弘農王語  
不可了全經大意却在論語中其語子貢曰微管仲  
吾其被髮左衽此經端爲懷夷狄而作漢武出壁中

遺典制詔會稽守令以春秋對毋縱橫而是時十八  
羽林郎連行殊遠致匈奴過陰山皆下馬痛哭一時  
師武臣力大足發舒華夏之氣亦天子表章六經報  
也逮其後班定遠通公羊春秋猶能以三十六人橫  
行西域見東觀漢記何物權郎王安石小名遽汰之於學官其  
三不足之說根本在侮聖言一語曾幾何年而月破  
黃昏人斷腸謝元及有憶王孫之咏矣此詞爲淵聖幸虜營作  
靖康初始立春秋博士賊過張弓噬臍胡及當時宣  
和帝沙漠傳書僅寫趙岐注孟子何不令諸土宰相

日誦春秋數紙代神宗懺悔耶故予謂漢之威行絕  
漠非衛霍也吾家江都相吾丘壽王諸人力也不幸  
而爲趙氏其爲貌類太子所劫者荆舒也非黼貫也  
明興青田先生獨深麟學其創春秋制義實三百年  
文士之祖遂爲佐命魁驅夷不在洪水下長陵命  
諸儒輯春秋大全而榆川之役北斗且南至不見虜  
一騎此大聖人機用又非多欲者所能並轡矣經術  
關華夷氣運確然若此今之上馬擊賊下馬作露布  
者亦畱心晚周爛朝報乎于忠肅若不熟此書幾爲

亡宋覆轍乃譁謂浙人不可用試問 國家開天再造誰氏之功亦欺天甚矣

東坡與湖士有筆墨緣

吾友王復之綺歲有文章聲尤嗜古不減慰祖書淫嘗評註坡文十許卷眉公敘其書謂注書落剽竊則膚落訓詁則俗復之有正箋有旁書不卽不離乍前乍却頗似劉孝標註世說陸農師註埤雅都人士以爲知言近讀陸放翁集施司諫注東坡詩序略云某告老居山陰澤中吳興施宿武子出其先人司諫公

所注數十篇屬某作序司諫公以絕識博學名天下  
用工深歷歲久又助之以顧君景蕃之該洽則於東  
坡之意幾可以無憾矣今王梅溪百家纂註中無司  
諫及景蕃名字卽司諫亦不知何許人閱宋史及唐  
一菴先生所輯郡志了不可得獨文獻通考云施元  
之字德初註東坡詩四十二卷年譜目錄各一卷與  
吳郡顧景蕃共爲之元之子宿推廣爲年譜郡志僅  
載元之長與人張孝祥榜進士而已坡集從無佳刻  
甚詳何

未引及

吾舅孝若從焦弱侯先生所蒐剔極富較舊本殊勝

而別爲此老下注脚者前司諫後復之吾湖中君子  
於眉山當不淺筆墨因緣也

閔康侯曰陳思海棠譜引吳興沈氏注東坡詩王  
梅溪載百家注姓氏有芮國器則知宋時不獨一  
司諫

### 拆字不始謝石

陳晦伯天中記紀蜀謝石事甚悉閱周益公二老堂  
雜誌載石一事乃晦伯所漏者有人過于塗告以婦  
不能產書日字于地石曰明出地上得男矣其驗如

此又程史云淳熙乙酉哲文倦勤詔以北宮爲重華宮光宗旣登極群臣奉表請以誕聖日爲重明節如故事時先君維舟琵琶亭有術者以拆字自名過焉因漫呼問家人字蹟多奇中命飲之酒忽作而曰近得邸報乎重華重明非佳名也其文皆二千日兆在是矣旣而甲寅之事果如其言此與太平興國一人六十之讖無異又睽車志云皇甫坦自言數百歲人爲人書字亦多驗者汪國正遠猷登第已踰壯室以未有子爲憂求字於坦書一湧字已而汪授吳江簿

生男乃悟湧字江下男也有士人赴省試坦書落字與之士人不樂及揭榜乃第二十三名因視其字草頭卽二十其傍從水不爲點而作三畫右筆止作一點乃名字耳又夷堅志云蜀人謝石紹興八年來臨安一時占驗尤異文惠公方赴調目擊兩事士人樊將仕妻失玳珠冠書失字命厥夫詣肆石曰盛門姻戚豈有朱氏乎樊曰吾妻朱氏也有第二十八者乎曰妻兄也曰然則從此取之樊曰此人素持行檢家豐富豈肯爲此盜事曰不然必因與之交關誤持去



其物固在可得也樊歸語妻妻詢之侍婢云數日前二十八舅曾借物否婢云昨欲出謁曾借帽子旣而不用就還原未嘗開匣也謾啓視之冠在帽下蓋曩因晒帽誤置其中久而忘之矣同邸一選人病書申字以問中帶燥筆客退謂坐者云丹田旣燥其人必死或曰應在幾日曰不過明申時果然又云新安朱安國善相字紹興三十二年六月至鄱陽是歲壬午當舉場開士人多在州學從之占問段毅夫示以飛字朱書其側曰二九而升扣其說對曰飛之爲字從

二從九從升但據筆畫言之不能知其義未可便決禍福及秋試以第十九名薦送朋友賀之曰十九者第二九也君必正遇已而省試失利乾道元年乙酉再舉復中十九名遂登第始悟二九而升者兩次九方成耳是時有老齋僕王明者少日亦讀書爲貧所苦棄業爲隸書慶字示之笑曰此雖小人中心作文而不遂又恨其必字勢偏左主左脚踏蹙之疾旦夕却招婚姻之喜坐者云所說極切當其人三十歲中風溼故左脚不良但今已七十自有妻安得如後一

轉語後旬日爲人家作媒嫁女頗獲謝禮趙哲彥通以周易應乙酉舉遭黜謀改習賦朱適再來因書易字求相朱曰得非有更易之意乎此字从且从勿當且勿易終必得遂仍舊預貢文惠公爲叅知政事上章丐去未諧朱訪予予曰用書信中字可占否曰可卽指書中去字使觀之其體帶艸朱捧玩咨嘆曰此尊官是貴人今所占何事予曰見任兩府方力求去朱曰正鑽頭出天上將位冠百僚無庸詢休逸之請後兩月拜相然此學不始謝石元命包之土力於一

爲地兩人交一爲水八推十爲水兩口御士爲喜說  
題辭之日生爲星十夾一爲土西合米爲粟考異邨  
之蟲動凡中爲風春秋說之人十四心爲德詩說之  
二在天上爲酉風俗通云丘之字二人立一上一者  
地也四方高中央下象形也孝經古契之卯金刀字  
禾子說文之推一合十曰士以一貫三曰王又孔子  
曰禾可爲酒禾入水也以禾入水三字合而爲黍說  
題  
論云禾入米爲中壘校尉之三田一土阿瞞署合字  
粟與許說小異  
之爲人一口闕澤知曹丕之爲不十孔融嘲氏儀之

民無上蜀趙直占牛角及口之爲公字王恭之黃頭  
小人郭禹之尸下至爲屋蕭道成讖曰戊丁之人與  
道俱晉襄國譙古居左月狂右讓去言或入口後石  
勒竟都焉符堅初有謠曰魚羊田斗當滅秦桓玄僭  
號大亨識者以爲二月了符融知左水右馬之爲馮  
張亮知山上絲之爲幽州梁武帝書貞字爲我與上  
人破侯景字成小人百日天子蕭琮改元廣運父老  
曰運之爲字軍走也吾君當爲軍所走乎劉昉云名  
是一萬日隋煬嘗會飲拆杏娘杏字爲十八日杏娘

拆宮婢羅羅字爲四維帝謂蕭后曰能拆朕字乎  
后曰移左畫居右非淵字乎唐玄宗於弘農得寶符  
篆文正成乘字或解之云乘者四十八年他如天正  
之爲一止宣政之爲宇文亡日隆化之爲降死宣和  
之爲一日宋北夢瑣言本中斗之爲朱字舊唐書崔  
湜傳鏡之爲立見金癸辛雜識理宗之爲四十一年  
王者貴耳集嘉泰之爲士大夫皆小人有方者喜又  
袁康吳平之越組錄魏伯陽之叅同契跋孔北海之  
離合詩陶隱居真誥之清靈真人詩定錄中候告此

類不縷舉皆盲史氏止戈皿蟲二義逗此一派耳世

傳昉於石此與耳食何異

玉海引降昌爲二日天保爲一大人只十大象爲天

子冢大業爲大苦末咸字人口有戈靖康爲立十二月康建炎爲雨火又南北史謠謠甚多不具錄

泊宅編蔡京嘗遊吳興慈感院院有新堂未名京

爲書榜曰超覽有坐客賀曰行即走召而人臣四

見矣明年京遂入相潛居錄黃平夢書一髮字書

髟而止索統曰此亡友也是日果有友人訃至西

湖志餘楊王沂中間居微行遇一相押字者王以

所執拄杖就地作一畫相者驚拜曰閣下自宜愛

王愕然問其故相者拜曰土上一畫乃王字也當  
封王無疑又金壁故事術士之占二蘇魯直所謫  
州名相字心法張乘槎之占來遠豐德

閔康侯

子建未可輕詆

劉彥和文心雕龍摘陳思瑕語謂其誅武帝云聖體  
浮輕誅明帝云尊靈永蟄至以蝴蝶昆蟲譏之按廣  
雅曰二氣相接輕清爲天宣夜曰天無質日月衆星  
自然浮生虛空之中以天擬父蒼蒼者亦韓憑所化  
乎繫辭云龍蛇之蟄以存身也蟄龍不可以喻死君



則飛龍獨可以喻生君乎文人相輕直是不度德不  
量力今枵然其腹而侈東莞之譏彈者亦榆枋之咲

也

按曹集浮輕語出獻襪頌永  
蠶語出武帝誅劉亦誤引

按雕龍書記篇云王褒髯奴則券之楷也夫縛箠  
裁孟出子淵之僮約癩鬚瘦面錄文彊之諧語總  
也混之非其瑕乎所謂目察秋毫不自見其睫者  
也

戲集東坡書

掇芳飲秀鑿石疏泉喬木風霜流暉欲盡山川俯仰

物外高深與客來遊清閒送老

龍穴砂水

擘開華嶽連天色放出黃河到海聲此禪家語也余謂丈夫胸中不可無此觀然須灼見龍穴砂水始得不則增上慢比丘耳

先天數

予過外舅大司空沈公所適塘棲范君上池在座范云胡翰林休復

胤嘉

丙午北遊太學會嘉興陳生曉

先天數胡命發策其數云祝融歲首子系入場煥乎

鸞鳳之文章胡未解入京往西山中八月四日始移  
寓棘闢之左胡問主人何姓曰姓孫竊喜以爲數之  
奇合是歲果預薦司空曰吾戊申歲華生者來謁自  
云無錫人有秘數公有所問不俟公言當知之吾微  
哂華謂公無咲請先書別紙置硯下公隨手取架頭  
書看一語藏之胸中且勿言視硯下所置有差池否  
吾因抽架書得仙人騎白鹿五字發硯觀之則華先  
書此五字於別紙矣古人云思慮未起鬼神莫知竟  
不知此君何術公因謂萬事有定數不可干長興某

公生子時夢郡公送亞卿棹楫至其家比長甚穎慧  
領賢書之夕復夢亞卿二字凡上春官者屢亦屢夢  
夢輒如前數不第以前夢有待未肯謁選也年已六  
十始詣吏部授邑令得西鄉縣焉蓋西鄉之與亞卿  
字相類也神之巧弄若此東林陳方伯繡山自滇中  
致政歸伏月曉故書得少時手寫四書旨書尾有細  
字數行取閱之乃公三十載前紀夢中神語云官至  
布政文子云智同則有數禽無數者一種人不讀邪  
金辨命論垂死與數爭可不爲大哀耶

再紀數之奇中

張因憶得數事嘉靖甲寅倭警至海上督府募方技士得新安人汪龍置募下龍瞋臣也自言遇異人授觀梅數遇物而推其用四十有九督府公手安息香一握令卜之龍曰香之用焚烽燧且至析之有八七縣一州數也中一枝斷爲二一邑當陷又損而未斷者一一邑其瀕危乎然未燎於原猶可撲滅有募府方略在寇不歸矣數月賊破崇明殺其令轉寇崑山幾陷僅得全我師帥苗兵躡之至盛墩寇殲焉匹馬

觴輪無返者龍所言若司契云任丘田大司馬未第時邑有石橋久隕矣公倡議復之率邑諸生請於令令敬諾掘土二尺許得一碑云田樂重修蓋百年前精數者懸記也萬曆庚辰先君偕伯念兄上公車入都聞有精康節數者先君適有他營命伯念先往諏之伯念抵其寓其人問所卜云何伯念曰問場屋事耳人曰試隨手拈一物來適儿上陳象戲伯念取士字授之問伯念年幾何曰庚申生其人曰足下今必策名名必在第十一伯念詰之其人曰君庚申生人

也年正二十有一今徒步而來其象爲之二十人着一之字非進字乎手拈士字非進士乎士十一也又棊以木成足下生屬石榴木木數三八錯綜之數十有一故曰名在十一先君後至亦拈士字問之其人曰賢子拈餘已落第二二木未象也公之發其癸未乎已而果然溫員嶠宗伯爲予言雒城吳甘泉布衣玳瑁深郡蔡之學顧箬溪司寇妙解句股六壬撫滇時諸蠻驚以爲神今閔昭余大叅亦亞之庚申春遼事孔棘予問遼可瓦全否昭余曰今無恙獻歲發春遼

陽非我有也 神廟登遐諸薦紳臨郡中昭余私謂  
余曰 國家更有大喪將若何九月而 貞皇帝復  
有鼎湖之耗矣藺州難起昭余奔命蜀中所向無堅  
賊得六壬力爲多張往入北雍聞官黃門賜浴亦洞  
曉六壬偕長水楊若木費元朗謁之元朗館黃門家  
具以告黃門曰謀得連茹三君所云同功一體也是  
秋三人者俱繳翩歸嗟乎人皆陰陽中人也有能於  
五行外剗定脚根者誰其人哉然天下定無理外之  
數易言鬼謀足矣而必先之以人謀範言龜從筮從



足矣而必協之以汝則從卿士從庶民從魏高允明  
於歷數初不推步有所論說游雅數以灾異問允曰  
昔人有言知之甚難旣知復恐漏泄不如不知也天  
下妙理至多何遽問此梵網經云不得以爪鏡著草  
楊枝而作卜筮或問雲棲大師曰師何以不貴前知  
師云譬如兩人觀琵琶記一人不曾經見一人曾見  
而預道之畢竟同觀終塲能增減一齣耶讀之劃然  
無以數爲矣

崔伯深

客語崔浩曰子非病乃苦吟詩瘦耳閱北史浩傳浩  
不長屬文畱心制度經術之言至夢與鬼爭議又好  
觀星變常置銅鈹於酢器中令青衣有所見卽以鈹  
畫紙作字記其異所云苦吟者意別有人在如兩秋  
胡歟浩父宏善索靖書符氏亂欲避地江南爲張願  
所獲志不遂作詩自傷浩用事時拓跋氏欲南下浩  
輒止之宋書柳元景傳云浩密懷異圖抑或有據然  
則浩亦繩父之志者歟浩被禍時河東柳一時并命  
而同命之高伯恭自云臣多於浩卒宥之石銘嬰僂

駕說耳

崔浩受禍自有故其說始于閩中鄭省齋并觀焦氏因之按內典云浩讒佛法帝然之遂滅佛法後延曇始頂禮悔過廢經五載帝被癘疾遂誅崔氏還興佛法此又一說也

嘉靖甲寅倭變紀畧

偶從舊書中得抄本十許紙紀前甲寅倭入吳雜事不著撰人名客潘君受之里隱者吳生云其語似吳越間人詞多野不可讀第爾時目擊其難語當無妄

者輒取數事刪潤之如左

賊攻太倉浹日矣不下由裔

音晃

子鋪徑趨崑山城築

長圍祝令其命丁男守婦女運磚石擊賊賊置雲梯  
百枚撞城復昇大樹上架樓船與堞竝城中兵手長  
槍拒之石如雨賊不能克會大旱城中井泥不可飲  
飲輒病令先吏民跽禱雨立澍濠洫盈尺又告薪盡  
折扉中梁椽付守者相距四十有七日民力疲饒箭  
礮垂盡令誓以死守賊渠帥二大王名獍驛最先以  
大船覆城下避矢石部其衆穿隧道入晝夜更番幾

破矣令率城中人籲天臨城中婦女至有雉經者忽一老卒者從傍出語令聞此城土下有板卽大人無以卒譟語速出之投以熾火群賊且立盡城可完尉史惟未信卒環臂詎曰此百萬生靈呼吸生死事癡人何所須耶廼公當使諸君立見就要下出鈍刃掘城土二尺許橫一大木木盡賊見衆俯槍刺賊隨以蠟苴竹木難火投穴中賊半焚死不得脫二大王者亦斃餘賊慟挾之出城上萬礮齊擊之賊多扶傷去適偵援兵大至圍始撤瞑矣令然燭呼卒前謂卒此

城獲全汝力也詰朝有殊賞行申報軍門汝功不次  
吾平日恨不聞汝汝何許人好語令卒以唐勝對且  
曰公無召勝勝達曙敬謁公令翌日具酒脯鏹幣諭  
城中人選名馬鼓吹迎勝入抵漏盡勝不來令曰此  
卒介冑蟣蝨矣勞苦五十日不獲休今寇去歸舍作  
一兩日鼯臥呼妻子補衣綻洗頭上泥土了然後庭  
謁耳遲之七日竟杳然守城卒千人盡呼入按籍求  
之無名唐勝者令噴然太息曰嗟乎勝古義俠君子  
也存國而不矜懸昧而不赴樹奇而遁名得十許人

立朝何憂不治天下真有曾連生哉卽百令何足較  
勝勝不來吾立解印綬然亦不敢歸俟得勝謝城中  
人使俠士不當吾世而湮沒吾歸耳或曰公無然利  
之所在皆爲賁諸此賢者難之况傭卒乎公精感百  
神故神人易貌變服以發公誌所載唐將軍卜勝者  
其人也令悟鳩工崑山顛立卜將軍廟割牲羅拜祀  
春秋至今不衰鹿城不陷則祝令公之爲也

浙直督撫屢易唯周石崖頗久石崖開幕引士信賞  
明罰將吏多用命他如屠中丞寇抵城下焚劫殊酷

猶高會麗譙談笑晏如謠曰徒多爲人所憎惡耳吳  
語多爲都徒多云屠都也又如曹公先去爲民望鄉  
先生畱之曰身在井上乃可救井中人江南有屠曹  
可爲節鉞羞云

二公姓氏  
爵里當攷

任同知環臨敵不顧身勞苦功高一時少匹公所御  
戰甲盡寫任字四體亦徧記姓名毅然有身膏艸野  
之志逢賊手搏瀕死者屢矣寇平以忌者言僅遷臬  
副公平寇勲見劉子威記中此可補入同時海防僉  
事董君邦政起家國學以軍功歷今官



廣西女土官瓦氏率萬人來援泊胥關月餘馭衆有  
法度約所部不犯民間一粒軍門下檄輒親視居亭  
民訴部夷奪酒脯者立捕殺之食尚在咽下其出軍  
幟分五色以別行伍頭裹方素無他色者或問之瓦  
云身是孟獲裔孫感武侯七赦恩誠子孫世世戴縞  
以識不忘耳吁侯之威神遠攝視秦人刻石爲盟何  
如哉

按弇州宛委編云永順永靖二宣慰至今尚冠白

巾爲武侯服

岳陽風土記云諸溪蠻嬪人皆用方素蒙首屈兩角繫腦後云爲伏波將

軍持服

又武侯與兄瑾書曰兄嫌白帝兵非精練到

所督則先帝帳下白毳西方上兵也按毳冠纓也

則武侯時業已尚白戴縞之說或亦先世誤傳然

而神之攝者遠矣

又清波雜志云廣南黎洞皆以白巾纏頭故曰冒白鄉風舊然

則冒白亦其習俗耳或

馬之或萬之豈駕說歟

寇盛時農家大半竄去比其還踰夏矣歲大饑中丞

周石崖直指周觀所交章請盡蠲百姓租詔許之

是歲民糧先輸者仍予民曠蕩之恩百世未之有也

吳中人藉二先生當兵燹餘不劇困謠曰蘇州一隻

斗救了萬民口謂周公如斗也

按此可爲地方官處兵荒後之法

先是寶帶橋海潮突至散入同里湖漸衰如是者三日江豚數百枚隨潮上下耆幼皆異之相傳此水故與海接潮汐如婁江陳黃門侍郎顧野王見潮至一喁而却是後潮竟不至土人稱爲喝潮王祀之龐山湖潮驟來海寇之徵也平望殊勝寺嘉靖初殿壁最高處忽有詩云我在蓬山跨鶴來老僧不在却空回凡夫欲問菩提記三十餘年化作灰字畫奇險寺僧甚恠之及甲寅寇至寺焚獨壁上詩字跡如新適符

其記云

吹景集卷之三 終